

Ehuhuo-Ozi Nke Ebuo Polu Dejenni Ndi Kọrẹnti Ndi Kọrẹnti, Nke Ebuo

¹ Mmẹ wu Polu de Ekwkwọ-ozini. M wu onyẹ-ozini pu-ichẹn nke Kraistị wu Jizosị ghahani uche Osolobue. Mmẹ le Timoti nwene enyi gba de e. Ndi uka Osolobue ri ali Kọrẹnti ke enyi ri e dejenni Ehuhuo-ozini, uwe le ndi nsọ ile hun we ile gba ri Azuun Akaya*.

² Efoma le udon hun gha eka Osolobue Nedi enyi le Di-nwenni-enyi wu Jizos' Kraistị bia ya rini unu.

Polu E Ye Osolobue Ekele

³ Ojija-mma ya rini Osolobue hun wu Osolobue le Nedi Di-nwenni-enyi wu Jizos' Kraistị. Nedi omiken k'o wu, Osolobue hun nkasi-obi ile gha eka a a bia.

⁴ Iya wu onyẹ a kasi enyi obi ime nsongbu enyi ile, keni enyi saeka e gi nkasi-obi hun Osolobue ye enyi nwen a kasi ndi ozo ri ime nsongbu owule obi.

⁵ Make ni, ke enyi don a ta oken afunfun make ifiri Kraistị, erira ke Osolobue donzikwo a kasi enyi obi oda-oda ghahani Kraistị.

⁶ Omeni nsongbu ri a biani enyi, o hu a biani enyi keni we gi e kasi onu obi, keni unu gizikwo a nwe nzuopuha; omeni we ri a kasi enyi obi, we ri e gi e kasi unu obi ebe unu no e wetu obi ali e dingbu udi afunfun ohu hu enyi ri a ta. ⁷ Ya wu, olil'anya enyi nwon banyeni unu turukwem. Make ni, enyi a

* **Isi Nke Ohu:1** Akaya le Grisi e d'e me ihien ohu.

maringhọ nị ke ụnụ dọn e sọn ẹnị a ta afunfun ke ụnụ dọnzi e sọn ẹnị a narin nkasi-obi.

⁸ Umune m, ẹnị cho nị ụnụ marin nị ẹnị ta oken afunfun ke ẹnị ri Azuun Eshia: we songbu ẹnị oda-oda, karide hun ẹnị le enwen ẹnị saeka din—nke wu nị ẹnị erozini nị ẹnị k'a hun isi. ⁹ Ezie, o te ri ẹnị ke si a maguo we ẹnị ikpe-onwun. Kanị, onwan me keni ẹnị gi Osolobue don ẹnị, Osolobue hun e weli ndi nwunni—hun nke ẹnị e gi gi enwen ẹnị don ẹnị.

¹⁰ Iya gbapuha ẹnị ime eje-onodi hu te k'e gbuni ẹnị. O k'a ri a gbapuha ẹnị. Iya ke ẹnị ri e lee ẹnị n'o k'a gbafuhazi ẹnị— ¹¹ ụnụ gha e sọn ndi ozo e gi ekpere e yeni ẹnị aka, keni ndi bu oda hun uzo gi ufiri ẹnị a kpanmin Osolobue, make ihien ri mma o gi efoma meni ẹnị ghahani ekpere ndi bu oda me.

Ihien Haij Polu Gizileni Jen Korinti

¹² Ihien ẹnị gi a nyan isi wu onwan: nị obi ẹnị ri a shiani ẹnị eri nị ẹnị gi obi ri ochan le ezioku Osolobue bi obibi ẹnị ime uwa, tumadu egbata ẹnị le ụnụ; nị ẹnị egin amamihiem uwa bi, kanị eyemeka Osolobue. ¹³ Make ni, ẹnị ara deni ụnụ ihien owule kari hun ụnụ a gun, o nị ụnụ ghota; kanị m ri e lee ẹnị nị ụnụ k'a ghotachanrin ẹnị, ¹⁴ ke ụnụ don nwan ghota ẹnị ekere. Eghee, ụnụ a ghotaguo nị ụnụ k'a saeka gi ẹnị nyan isi Uhuohin Nna ẹnị wu Jizosi k'a bia—noke ke ẹnị nwen k'a don saeka gizikwo ụnụ nyan isi.

¹⁵ Make ni onwan we m ẹnị haij m te gi kwademe nị m k'a biaguzi d'a hun ụnụ, keni o wuru nị ụnụ ngozi mgbe ebuo. ¹⁶ M te cho nị m bia d'a

hụn ụnụ m jẹnkọni Masedonia lẹ m kinkozi, mme lẹ ụnụ nodiguu, ụnụ e yeni m eka m jẹnkọni Judia.

¹⁷ Ogen m gi tu ironi, m ri eroshi-azuunni, eroshi-azuunni? Ra m'a tu iroko ke ndi uwa hun a si, “eghee, eghee” lẹ “mba, mba” mgbe ohu? ¹⁸ Kaka! Ebe o me ezie ni Osolobue wu onye-ezioku, oku enyi a gwa unu e metuni “eghee lẹ mba” nke onye e ku ebuo. ¹⁹ Make ni Nwa Osolobue wu Jesu Kristi, hun mme lẹ Sivanosi, hun w'a kpozi Saikasi, lẹ Timoti zi unu ozi e, ele onye a si “eghee,” a si “Mba,” kama, ihien ri ime e ogen ile wu “eghee.” ²⁰ Make ni, ime e ke nkwa Osolobue ile no e mezuchanrin, a wu “eghee.” Ya hain enyi gi a si “Isee” ghahani iya wu Jesu Kristi, e gi e ye Osolobue ogho. ²¹ Osolobue lẹ enwen e wu onye hun e me enyi lẹ unu e turukememe ime Kraisti; iya tumee enyi, ²² ye enyi ahima a ghahani iwe Mmonso a che ime obi enyi, gi e henrin mbiye ihien ile o k'e meni enyi.

²³ Kani, m ri a kpoku Osolobue n'o shiagbu m eri omeni ele ezioku ke m ri e ku ni ihien hain m gileni biazị Kọrẹnti wu ni a choni m ni m bia a jugboma m unu. ²⁴ Ari m e gi e e ku ni enyi nwe e ku ihien unu gi okukwe unu e me. Ele 'ya—ihien rin'a wu ni enyi lẹ unu gba a run keni unu nwehen ighogho hun k'a biani unu make ni unu turu ohunma ime okukwe unu.

Isi Nke Ebuo

¹ Ya ke m gi kwademe obi m ni abiakozu m ijen k'e buheni unu ufu. ² Make ni, m me unu ihien ufu, onye k'a gbazi m nwan ume? Ele ndi

hụn m meguu ihien ufu? ³ M de ni onu ehuhuo-
 ozi hu m de, amamgbe m'a bia, unu nwen, hun
 nke e me m ghoghọ, e me m ihien k'a fu ni m.
 Makeni, a maringho m onu ile ohunma-ohunma, ni,
 m ghoghoma, unu ile k'a ghoghoma. ⁴ Ekwan le obi ri
 a gbawani m ke m gi de ya wu ekukwo-ozu. E deni
 m'e n'o fu unu, kani m de e ni unu marin ni unu ri
 m obi oda-oda.

Gbaghari Ni Nwan Onye Ahun Me Njo

⁵ Omeni o nwon onye me ihien ufu, ele mme suo
 k'o me e, kani o nwongho k'o gi me ezioku ni unu
 ile k'o me e. M si ni “o nwegho k'o don me ezioku”
 makeni achoni m ni m benyeni oku. ⁶ Udi afunfunni
 ndi ka oda buche eka ye onye no enina e higuu.
⁷ Gbaghari n'a nwan, unu a roko a obi, amamgbe
 o sukurughafe oken, ndun okukwe a guu a. ⁸ Ya wu,
 dodo, o ri eka unu, ghosizi n'a n'o ri unu obi.

⁹ Lee ni ihien hain m gi de ya wu ehuhuo-ozu:
 m de e ni m gi e lele onu, gizi e marin ke onu k'e
 mechanrin ihien ile m si unu me.

¹⁰ Onye owule unu gbaghari, a gbaghari m'a.
 Ihien m gbaghari—omeni o nwogho ihien m
 gbaghari—m gbaghari make ufiri unu id'anya
 Kraisti, ¹¹ keni enyi gi e gbondon Ekwensu,
 amamgbe o tunarin enyi ihien ri mma—makeni
 enyi a maringho ero e.

Nwene i?

¹² Ogen m gi ru ali Trasi d'e zi ozioma Kraisti, m
 no hun ni Di-nwonna-enyi a kpopuguo uzọ m'e gi
 run'a orun ebegu. ¹³ Kani, obi eruni m ali, makeni
 ahunni m Taitosi wu nwene m ime Kraisti ebegu.
 Ya m no si we nodi ohunma, m no jenne Masedonia.

Imeri Ghahani Kraisti

¹⁴ Kanị ekele ya rini Osolobue —makeni, Osolobue hu e yesonme enyi mmeri ogen ile ghahani onye-mmere ahun wu Kraisti—rike ndi ri e sonhunme onye-mmere, e gi enyi e zisonme ozi Kraisti ebe owule enyi jen, noke ishin-oma ri e kungbamani. ¹⁵ Makeni, ebe Osolobue ri, ishin Kraisti ke enyi wu—ke ebe ndi ri e nwon nzuopuha ri ke ebe ndi lako iwi ri. ¹⁶ Ebe ndi ahun lako iwi ri, enyi ri e shin ishin hun e gbuni; ebe ndi we ri a zuopuha ri, enyi ri e shin ishin hun e ye ndun. Onye k'a sa nwan aka me ihien ndini? ¹⁷ Enyi anoni ke ndi bu oda hun e ghoroku Osolobue leke si ibu-afia ro; kama, rike ndi ri ime Kraisti, enyi e ku oku-Chuku rike ndi-ezioku le ndi Osolobue zi, rike ndi ri id'anya Osolobue e ku.

Isi Nke Eto

Ndi-orun Nkwerigbama Ohunni

¹ Enyi a jamazide nwan enwen enyi mma ra? Enyi ride nwan ndi ahun a cho onye e deye we ehuhuo biani unu keni unu kweri nabanhan we ra? Enyi ride nwan ndi ahun a cho ni unu deye we ehuhuo we e gi nabanhan we ra? ² Mba! Unu le enwen unu wu ehuhuo-ozie enyi, hun we deye ime obi enyi, hun ihian ile marin le hun ihian ile a gun. ³ Ihien we a hun ebe unu ri a ghosi ni unu wu ehuhuo-ozie Kraisti de, hun o gha aka enyi zihē. Ele hun we gi peni de, kanị hun we de ghahani Mmon-nso Osolobue—Osolobue hun ri ndun; ele hun we deye ibe omuma—rike Iwu mbu ahun, kanị hun we deye ime obi ihian.

⁴ Eriira ke obi ruhan ęnyi ali ebe Osolobue ri ghahani Kraisti. ⁵ Eleni ęnyi le enwen ęnyi nwe iken me ihien owule hun ęnyi e gi si ni o nwon ihien gha eka ęnyi a bia. Osolobue ya e me ęnyi gi e nwon iken e me ihien owule ęnyi e me. ⁶ Osolobue ya me ęnyi gi saeka wuru ndi-orun hun ma run orun ime nkwerigbama ohunni. Nkwerigbama ohunni ele nke Iwu we de ede, kani nke ime-mmom. Makeni hun we de e gbu egbu, kani Mmom-nso e ye ndun.

Nkwerigbama Akan Le Nke Ohun

⁷ O me nwan ni ofufe mbu hu gi ogho bia, ofufe hun e gbuni, hun we kayesonme ihien rin'a elu omuma, nke wu ni ndi Izrel' asani eka lee Mozizi ęnya ihun makeni ogho ri n'a ri e gbuke—ogho hun fapukoni— ⁸ ogho ofufe hunni we gha eka Mmom-nso e fe akariko a nwan, kari a ohunma-ohunma?

⁹ Omeni ofufe hu hun we gha a ma ihian ikpe e nwongho ogho, ya wu ni ofufe hunni, hun we gi a kpo ihian onye ri ochan k'a ka a ogho e nwon, ka a ohunma-ohunma!

¹⁰ Ezioku ri n'a wu ni ihien hun te nwon ogho mbu enwonzi nwan ogho, kaka—makeni hun ka ogho e nwon e kpumegu a.

¹¹ O me nwan ni nkwerigbama mbu hu le ofufe rin'a, hun we buguu nwan che usuo, gi ogho bia, ya wuni nke ohunni hun k'a to jenin ejen ka a ogho e nwon ohunma-ohunma!

¹² Ebe o me nwan ni ęnyi nwon udi olile-ęyani, ęnyi e ku, ekushi iken. ¹³ ęnyi anoni ke Mozizi hun gi ekwa kpume ihun, amamgbe ndi Izrel' a hun ebe ogho ahun ri e gbukeni no fapuchanrin.

¹⁴ Ezie, we kpume nghota we ogen hu. D'e rukwo

nwan tanni, wẹ gha a gụn mọbụ e gọn ntin kẹ wẹ rị a gụn Ehuhuo-nkwerigbama akan hu, ẹkwa hu huzikwo ebẹhu—makeni ime Kraisti sọọ kẹ wẹ nọ e wepu ya wu ẹkwa. ¹⁵ Ezie, ezie, d'e rukwo nwan tanni, oge ọwule wẹ gi a gụn Iwu Mozizi, ẹkwa hu e kpumechanrin uche wẹ. ¹⁶ Kanj, ihian buruhe Di-nwonni-enyi, o wepu a ẹkwa hu kpume uche e ¹⁷ “Di-nwonni-enyi” ahun wẹ rị e ku oku e wu Mmon-nsọ: ebe ọwule Mmon Di-nwonni-enyi rị, ebẹhu kẹ ihian nọ e weri enwen e. ¹⁸ Enyi ile, hun wẹ kpupuguu ẹkwa hu ihun, rị nwan e legha ogho Di-nwonni-enyi nọkẹ onyinyon rị ime ughegbe; wẹ hu e nwonhuto enyi ni enyi hun ọzo rị kẹ ihien ahun enyi rị e legha, e nwe ogho hu, e nwe waye e. Ihienni gha ẹka Di-nwonni-enyi, hun wu Mmon-nsọ, a bia.

Isi Nke Eto

Ndi-ozu Nke Ukpẹ

¹ Ya wu, ebe o me nwan ni Osolobue e meguni enyi omiken ye enyi orunni, ndun ara gu enyi. ² Enyi a juguo ihien-ifenren ndi hu ihian e zueme, juzikwo ime-ero le itu-ntu ye ime oku Osolobue. Eghẹ! Kama, enyi hu e kucharin ezioku k'o nọ, e gi e e wepuha enwen enyi a ghoji ihian ile idenya Osolobue, keni ndi ile e ku ezioku hun ọzo e lele kẹ enyi nọ.

³ Omeni echen kẹ ozioma enyi rị e zi zueri, ndi rị a la iwi sọọ k'o zuerini. ⁴ Nke wẹ wu ni mmon hun rị a ki uwanj e kenkinguo uwe ndi kwerileni enya, amangbe w'e legha ukpẹ ozioma ogho Kraisti; Kraisti, hun o me ni onye hunn'a a hunguo Osolobue. ⁵ Makeni ele ozi enwen enyi kẹ enyi rị e zi;

enyi rị e zi ozi nị Jizọs' wụ Kraịstị wụ Di-nwọnni-
enyi, nị enyi lẹ enwẹn enyi wụ idibo ụnụ makẹ ifiri
Jizọsị. ⁶ Makẹni Osolobue ohu hụ hụ sị, “Ukpẹ
ya nwunmẹ ebe ishi rị” ya nwun nwan ime obi
enyi hụn enyi gi nwẹ ikẹn legha ogho Osolobue ihun
Kraịstị.

Ihiẹn Rị Mkpa W'e Buche Imẹ Ihiẹn E Tikponi

⁷ Kanị Osolobue buche orun oziomanị rị oken
mkpa ime enyi—enyi hụn wụ ite-ayogbe hụn e
tikponi, keni o we enya nị ikenni pu-ichen enyi gi
a run a wụ nke Osolobue—n'ọ ghanị aka enyi bia.
⁸ W'e songbu enyi uzọ ile, kanị asanị wẹ aka biangbu
enyi; ihiẹn ndi hụn a gba enyi nghari-enya hụ a, kanị
ndun ara guu enyi; ⁹ wẹ e kpokposonmẹ enyi, kanị
Osolobue a junị enyi to; w'a kutu enyi, kanị enyi ara
nwun. ¹⁰ Ihiẹn ehụ enyi a hụn ogeen ile e mẹ ihian
a hụn onwun Jesu nwun, keni, ihian gha a hụn nị
enyi hukwo ndun, e gi w'ẹ marin nị Jesu rị ndun.
¹¹ Makẹni, hunnị enyi rị ndun, ihiẹn onwun gi a kpo
enyi ihun a bia nị enyi ogeen ile makẹ ufiri Jizọsị, keni
ihian gi ehụ enyini hụn a nwunhunnị a hụn nị Jizọsị
rị ndun. ¹² Ya wụ nị onwun rị orun ehụ enyi, kanị,
ndun k'ọ rị a runfuha ime unu.

¹³ Kanị ebe o mẹ ni enyi nwon agungun okukwe
ohu ahun wẹ ku oku ẹ ime Ekukwo-nsọ, sị, “M
kweri ekweri, ya hain m gi ku ihiẹn m ku,” enyi
nwen kwerizikwo ekweri, ya hain enyi gi rị e ku
oku-Chuku enyi rị e ku. ¹⁴ Makẹni, enyi a maringho
nị Osolobue hụn gha onwun weli Nna enyi wụ
Jesu jenkọ d'e welizikwo enyi k'ọ don weli Jesu,
webanhan enyi lẹ unu ebe 'ya lẹ enwẹn ẹ rị.

¹⁵ Ezie-ezie, ihienni ile wu n'ọ rini unu mma, keni ndi efoma Osolobue ri e ru eka hun uzọ e buwaye ọda, ekele ri a biani Osolobue a bawaye ọba.

Igi Okukwe E Bi

¹⁶ Ya wu, ndun aguko enyi. Oson'a ni ehụ enyi ri a kpo nkun, enyi hu e nwonwaye ndun ohun ime-mmoh uhuohin-uhuohin. ¹⁷ Makeni, ekere afunfunni enyi ri a ta ogeni, hun ghaleni e bie, ri nwan a kwademe enyi a toni ogho itebite hun we ghaleni a saeka e ku ke o han. ¹⁸ Eghee, makeni enyi ari e lee ihien enya e legha, kani ihien enya ghaleni e legha; makeni ihien enya e legha k'a ghari, kani ihien enya ghaleni e legha k'a to jenin ejen.

Isi Nke Isen

¹ Makeni enyi a maringho ni omeni e tikpo we ehụ enyini, oduni enyi bi ime e ime uwan, enyi e nwongho ulo hun Osolobue tun, hun we gileni eka tun, hun ri elu-igwee, ulo hun k'a to jenin ejen. ² Ime oduni enyi ri kikenni, enyi hu a sun-uden, o hu a gun enyi oda-oda ni we yime enyi ehụ enyi hu— ulo enyi hu, hun ri elu-igwee— ³ hun o me nwan ni enyi yiriguu a, enyi e meko ndi gba oto. ⁴ Makeni, hunni enyi rikwo ime oduni, ime ehuni, enyi hu a sun uden makeni ibu ri a nyin enyi. Eleni enyi cho ni enyi gba oto, kani, enyi cho ni we yimezi enyi hun-ebọ ahun, keni ndun luefu hun a nwunni—weri onodi a. ⁵ Onye hun kwademe enyi toni onwonhuton wu Osolobue. O yeguọ enyi Mmon-nsọ nọke mbiye, gi ghoji n'o k'e me e.

⁶ Ya wu, obi e ru enyi ali ogen ile, oson'a ni enyi a maringho ni omeni enyi ri ime uloni wu ehụ enyi,

enyi ari ebe Di-nwonna-enyi ri, ⁷ makeni ihien enyi kweri banyeni Kraisti ke enyi gi e bi obibi, ele ihien enya enyi ri e legha. ⁸ Eghete, obi e ru enyi ali, nke wu ni o kade enyi mma ni enyi gha ime ehuni pu, laburu Di-nwonna-enyi d'a nodi ulo enyi hun ri ebe o ri. ⁹ Ifiri e, enyi a liliima ni enyi e me ihien a suo a usuo efo ogen ile—ke enyi ri ndun ime ehuni wu ulo enyi ke enyi ari. ¹⁰ Makeni enyi ile k'a puha ihun Oche-okink'ikpe Kraisti n'o kin enyi ikpe, keni onye-onye hun uzọ narin ugwo-orun ihien o run k'o ri ime ehuni—ke mma ke njo.

Orun Iwekinhen Ihian Ebe Osolobue Ri

¹¹ Makeni enyi a tu egun Di-nwonna-enyi, ya hain enyi gi a liliima ni enyi me ndi ozọ kweri; kanị Osolobue a maringho enyi le enwen enyi ohunma-ohunma; e gigho m'a don ni unu nwen a maringhozikwo enyi ime obi onu.

¹² Ekekwo ni enyi rizi a gwa onu ni enyi a rika mma! Mba. Enyi ri e ye onu ihien k'e me onu gi enyi nyan isi, keni unu saeka za ndi gi ihien enya e legha a nyan isi hun nke we gi gi ihien ri ihian obi nyan isi.

¹³ Makeni, omeni enyi e me ke ndi uche we zulenị, ifiri Osolobue ro; omeni enyi e me ke ndi uche we zu, ifiri unu ro. ¹⁴ Ihien-osusu Kraisti nwe jenni ihian ya ri e nu enyi, makeni o wegwo enyi enya ni, ebe o me ni onye ohu a nwunguoni ihian ile onwun, ya wu ni ihian ile a nwungwo. ¹⁵ O nwunni ihian ile onwun, amamgbe ndi ri ndun gha e bizini enwen we, kama, ni we e bini onye hu gi ifiri we nwunhun, Osolobue e gi ifiri we weli e.

16 Ẹnyi arizi nwan e gi ẹnya-ihian e lee ihian. O sọn'a ni ẹnyi te gi ẹnya-ihian e lee Kraisti mbu, ẹnyi ara gizi e e lee e. 17 Ya wu, onye owule ri ime Kraisti a wuruole onye we kedonzi; ihien akan a gharigu, lee e, ihien ile e henringu nke ohun!

18 Ihienni ile gha eka Osolobue bia, onye hun donzi egbata ẹnyi le iya, wekinhen ẹnyi ebe o ri ghahani Kraisti; o no nwan ye ẹnyi orun iwekinhen ndi ozo ebe o ri. 19 Ya wu ni Osolobue ri ime Kraisti, e donzi egbata ya le ndi uwa; ara gizi njo we son we. O wegwo nwan ozi ya wu idonzi-egbata che ẹnyi eka zisonme. 20 Ya wu ni ndi-ozu Kraisti ke ẹnyi wu, Osolobue gi ẹnyi e ku onu a; ẹnyi gi nwan efan Kraist' e ku: dodo, o ri eka unu, "Kinhen ni d'e kunrun Osolobue!" 21 Osolobue gi ifiri ẹnyi gi Kraisti hun meleni njo owule henrin onye me njo, keni ẹnyi hun uzọ henrin ndi ri ochan.

Isi Nke Isin

1 Nọke ndi we le Osolobue gba a run, ẹnyi ri nwan a gwa unu oku: dodo, o ri eka unu, anile ni efoma Osolobue hun unu nabanhanguu la iwi. 2 Make ni Osolobue si,

“Hun o gi hu ru ogen furu ni,
m no nu olu unu;
o ru uhuhin nzuopuha,
m no yeni unu eka.”

Lee n'e, kikenni wu ogen hu furuni! Tanni wu uhuhin nzuopuha!

3 Ẹnyi ari e me onye owule uke, amamgbe ihian a hun ihien w'e gi koriani orun ẹnyi ri a run ni Osolobue. 4 Mba. Kama, ime ihien ile, ẹnyi a

ghosichanrịn nị ẹnyi wụ ndị-ọrụn Osolobue: gha-hani idin oken ndidi—ime nsongbu, ime afunfun le ebe o no ri ke si ihien ile e wiwichanringuo nị ẹnyi; ⁵ we hu e gbu ẹnyi ili, e gbu ẹnyi mkpinsi; w'e bu ẹnyi e che ime ulo-ngan, w'a kpu ẹnyi e gbu; ẹnyi a run oken-ọrụn, e chu-uran, e bu egun. ⁶ Ozozị, ẹnyi hu e donme obi ẹnyi ochan, e nwe amamihien, e nwe ndidi, a ri nsọ ime-mmọn, e nwe efoma, e nwe ihien-osusuo ibe ẹnyi hun gha akpakali-obi fuha. ⁷ Ozozị, ẹnyi e ku ezioku, ẹnyi a ghoşi iken Osolobue, ihien-ogun Osolobue cho suo ke ẹnyi gi a lu, iya suo ri ẹnyi eka-nni, ri ẹnyi eka-ekpen. ⁸ We hu a gbaye ẹnyi, e legberizikwo ẹnyi; w'e ku oku ẹnyi ohunma, e kujazikwo oku ẹnyi; w'e me ẹnyi ke si ẹnyi ele ihien ẹnyi si ni iya ke ẹnyi wu; kani iya ke ẹnyi wu. ⁹ Ẹnyi no ke ndi we marinleni, kani a maringuo we ẹnyi; ẹnyi no ke ndi ri a nwunni, ka lee ne nwan, ẹnyi hu ndun! W'e ye ẹnyi afunfun, kani ẹnyi anwunni. ¹⁰ Ihien ekwan e mesonme ẹnyi, kani, ẹnyi a ghoghọ ogen ile; ẹnyi no ke ndi igbenye, kani ẹnyi e me ndi bu oda a wuru idafin; ẹnyi no ke ndi nwonleni ihien owule, kani ihien ile wu nke ẹnyi.

¹¹ Ẹnyi a shiapuguo ni onu ndi Kọrẹnti efo! Unu a hunchanringuo k'ọ ri ẹnyi obi. ¹² Ẹnyi ari e zuemeni unu efo—kani unu e zume nke unu. ¹³ M ri nwan a rio unu noke umu m: me ni ni m ke m don meni unu: shiapuchanrịn ni nwan efo.

Donme Ni Ulo-nsọ Osolobue Nso

¹⁴ Anile ni we kpagbama unu le ndi kwerileni ntutu ohu. Elee mmeko ke ezi-omume le eje-obibi nwede? Elee mmeko ke ukpe le ishi nwede? ¹⁵ Elee ogen ke Kraisti le Ekwensu gide kwerigbama?

Kini rife egbata onye kwereini le onye kwereini?
 16 Elee oge ke Ulo-nsọ Osolobue le mmon gide
 nweme mmeko?

Enyi wu Ulo-nsọ Osolobue, Chuku hu ri ndun—
 noke ke Osolobue don ku e, si,

“ M k'e biri ime ndun we,
 e jehunme ime igunrun we.

M k'a wuru Chuku we,
 a wuru we ndi nke m.' ”

17 “Di-nwonna-enyi si,
 gha ni nwan ime igunrun we puha,
 unu a nodi azuun ichen;
 emetukwole ni ihien owule ru unyin aka:
 oge ahun ke m'e gi nabanhan unu;

18 a wuru m nedi onu,
 onu a wuru umu-m-ikennye le umu-m-ikpoho,
 Iya ke Di-nwonna-enyi Hun-nwon-iken-ile ku.”

Isi Nke sa

1 Ndi ri m obi, ebe o me nwan n'o kwesonmeguo
 enyi nkwa ndini we, ni enyi chanchan nwan enwen
 enyi, chanpu ihien owule hun e meru ehụ le ime-
 mmon, e gi egun Osolobue a hun a ni enyi richanrin
 nsọ.

Nke We Ke Polu Ri E Ro

2 Nabanhan ni enyi ime obi onu; o nwonna onye
 enyi me eje-ihien; o nwonna onye enyi wiwi; o
 nwonna onye enyi tunarin ihien e. 3 Ari m e ku onwan
 ni m gi ma unu ikpe, makeni e kuole m'a mbu ni
 unu ri enyi obi—nke wu ni enyi k'a saeka son unu
 nwun, enyi k'a sazikwo aka son unu ri ndun. 4 M'e
 gi unu a nyan isi oda-oda; m'e gi unu a dukemeka

obi; unu a gba m umẹ oḁa-oḁa; imẹ nsongbu ẹni ile, m'e gi ifiri unu e nwe ighoghọ oḁa-oḁa.

⁵ Makeṅi, ke ogeṅ ẹni gi rude Masedonia, ehu ẹni e ezuni iken kaka; we kpokpo ẹni azuun ile —oku-le-uka fihunme ẹni, egun hu a tu ẹni ime obi ẹni. ⁶ Kani Osolobue, hun a kasi ndi ndun guchanrin obi no gi obibia Taistos kasi ẹni obi. ⁷ Elede obibia a suo kasi ẹni obi, kani, nkasi-obi hun ya le enwen e nwe make ihien o hun ebe unu ri, kasizi ẹni obi. Makeṅi, o gwaghọ ẹni ke m don ri a da unu! Ke eje-ihien hu meni don wute unu! Ke m rihan unu obi! Ya ke m no ghogokenme.

⁸ Ifiri e, osuon'a ni ihien m de ime ehuhuo-ozu ahun a fughọ unu, akwanzini m mmani—(kani e te kwaghọ m, makeṅi m hun a ni e giguọ m ya wu ehuhuo m de me unu ihien ufu—osuon'a ekere ogeṅ suo ro.) ⁹ M ri nwan a ghoghọ. Ari m a ghoghọ n'o fughọ unu, kani, n'o fughọ unu hun unu gi roghari —ya wu ni unu a nighọ a fu unu udi hun Osolobue cho. Ya wu ni ẹni a runi unu ehụ owule, kaka. ¹⁰ Makeṅi ihien futu ihian ke Osolobue don cho, o me ihian gbhuto obi, bihuto eka, o wehe nzuopuha. Mmani ara ri a! Kani ihien futu ihian ke o don a fu ndi uwa, o buhe onwun. ¹¹ Unu ahunni nwan ke ime ihien ri mma ri a du unu makeṅi ihienni fu unu ke Osolobue don cho?! Unu ahunni nwan k'o rihan unu mkpa ighosi ni enya unu eruni ihien meni! Lee k'o ri e zehan unu ize! Lee k'o tuhan unu enya! Lee ke m ri a dahan unu! Lee oken adudu o buhe! Lee afunfun unu ye onye hun mefieni! Unu a ghosichanringuo ni eka unu a ri ihien meni.

¹² Ya wu, osuon'a ni m de ni unu ehuhuo hu, ele ifiri onye me eje-ihien mobu onye we meja ke m

gi de ẹ. Kama, m de ẹ n'o we unu ẹnya id'ẹnya Osolobue ni ẹnyi ri unu obi nke-esi. ¹³ Onwan a kasiguo ẹnyi obi.

Elede obi suo k'o kasi ẹnyi; kama, ighoghọ Taitosi mede ẹnyi ghoghokemẹ, makeni, unu ile e meguo nwan obi ru ẹ ali! ¹⁴ Eghẹ, unu anini ifenren isi m gi unu nyan ebe o ri me m. Isi ẹnyi nyan ebe Taitosi ri e me nwan ezioku nọke ke ihien ile ẹnyi gwa unu mbu don wuru ezioku. ¹⁵ Ifiri ẹ, ihien unu ri nwan a suokemẹ ẹ—o gha a nyanhan ke unu ile don humẹ isi, a nyanhanzi egun le ehụ-omuma-nni unu gi nabanhan a. ¹⁶ M ri nwan a ghoghọ—makeni m gichanrin unu don ẹnya.

Isi Nke Eṣatọ

Kẹ Ndi Uka Dọn E Ye

¹ Umune, ẹnyi cho nwan ni unu marin efoma Osolobue me ni uka risonme Azuun Masedonia: ² osuon'a ni we ri ime oken nsongbu, cheni igbennye-mgbeleke we wu, oken ighoghọ we nwe ime Di-nwonni-ẹnyi anini onodi we gbondon we, we no ye, ye oda-oda! ³ Mme ri a shiani we eri ni we wefuha obi ye ke we nwonhan, yekaride ke we nwonhan! ⁴ We riokenme ẹnyi, ẹnyi dodo me ohunma bu we cheni ndi ri a tu ihieni we ri a tunni ndi nke Osolobue; ⁵ kani, we yekaride ke ẹnyi tu ẹnya a: e buguu we uzo we enwen we ye Di-nwonni-ẹnyi, ya we no nwan gi ifiri uche Osolobue we enwen we ye ẹnyi.

⁶ Ya hain nwan ẹnyi gi si Taitosi, hun bidon orun-eyemekani, ya d'e yeni nwan onu eka runfu a. ⁷ Ya

wu, ke unu don nwan e me ohunma ime ihien ile— ke okukwe ke iku-oku ke imarin-ihien ke adudu ri mma ke ihien-osusuọ hun ri egbata enyi le unu, erira ke enyi chozi ni unu me ohunma ebe orun-eyemekani ri.

⁸ Ele ni m ri e ye iwu, kama, m choko ni m ghosi unu adudu ndi ozo nwon, gi e chopuha ke ihien-osusuọ unu nwe wu ezigbo e. ⁹ Makeni, unu a maringho ke Onye-nwonna-enyi wu Jesu Kristi mehan efoma: ni, k'o mele odafin ru, o gi ufiri unu henrin ogbenye keni unu gha ogbenye o dan wuru idafin.

¹⁰ Ndunmodun m ime ihienni wu onwan: o furu ni unu runchanrin nwan orun-eyemekani unu bidon akan-ahun. Unu bu uzọ runma a; elede ohun suọ, unu k'o bude uzọ duma ni unu me e. ¹¹ O ruguọ ni: runchanrin n'a nwan; gi ni nwan ihien unu nwon runchanrin a k'o don du unu ni unu run a isi-ibuzo hu. ¹² Makeni, omeni ihian wepuha obi e ile ye ihien, ihien o nwe ke we e lee enya a narin a ya, ele ihien o nwonleni.

¹³ Ele ni m cho n'o ri ni ndi ozo nfe, o wuru ni unu ibu. Kama, n'o wuru ahanmahan: ¹⁴ hunni unu nwon nwan oda bu mkpa gi we nwen, nke unu a ban ni we; o ruzi, oda we nwon e wehe ni onu ihien ri onu mkpa—o wuru ahanmahan. ¹⁵ Erira ke we de e ime Ehuho-nsọ, ni

“Nke onye hun kponrin oda

ehikeni;

nke onye hun kponrin ekere

emekeni ekere.”

Taitosi Le Ndi Hun Ya le We Wi

16 Ekele ya rịnị Osolobue hụn bu adudu ohu hụ m nwe make orinimma onu che obi Taiotosi. 17 Elede n'o kweri aririo enyi rio a suo, kanị, ebe o me ni kikenni k'o k'a du, o k'e gi uche e bia d'a hun unu. 18 Enyi zila 'ya le nwe-e-nyị hụ ndi ile kwerini marin ohunma-ohunma makeni o zisonme ozioma. 19 Elede ni ndi ile kwerini marin nwe-e-nyị hụ suo, kanị uka ile kwerigbamade, tume e n'o son enyi, enyi gha e jensonme a run orun-eyemekani enyi gi e ye Di-nwonn-nyị le enwen e ogho, a ghosizi ni enyi cho n'o rini umune enyi mma.

20 Enyi bu obi ni ihian ahunko ihien w'e gi koriani enyi make oyiyeni hi-ogbe enyi ri a na, 21 makeni, o rika enyi mkpa ni enyi run a hun ri mma, ele enya Di-nwonn-nyị suo, kanị enya ndi ozozị.

22 Enyi zilazi nwe-e-nyị ozo cheni we, nwe-e-nyị hūn enyi lelegu mgbe ole-le-ole hūn a ni o nwongho adudu ihien bu oda—kikenni k'o kazi adudu hū e nwon kari mbu, makeni obi rukeme e ali ebe unu ri.

23 O me nke Taiotosi, onye mme le iya a wi le onye mme le 'ya gba a run orun enyi gi e yeni unu eka ro; nke umune enyi ndi ozo hū 'ya le uwe wi, we wu ndi-ozị pu-ichen ri a nokin enya uka ichen-ichen, e weheni Kraisti ogho. 24 Ya wu, gi ni nwan oghereni ghosi ndini we ni unu nwe ihien-osusuo we, keni ndi uka ile hūn uzọ gi e don, a hūn we ihien enyi gi e gi unu a nyan isi.

Isi Nke Itenei

Ihien We Tunị Ndi Uka Ri Jerusalem

¹ O rịkani mkpa ni m de ni unu ihien owule banyeni ihien we ri a tuni ndi kwerini ri Jerusalem. ² Makeni, a maringho m ni ihienni hu a du unu. Adudu unu hain m gi gi unu nyan isi ebe ndi Masedonia ri, si we ni ndi ri Akaya a kwademeole kete akan-ahun; adudu onu a kpasuguo ndi bu oda ime we. ³ Kani m zila ni unu umune-enyi ndini, amangbe isi enyi gi unu a nyan a wuru ihien-mmaka ogenni. Kama, m cho ni unu kwademe, e che—ke m don gwa we ni unu k'e me; ⁴ omeni unu akwademeni, ndi Masedonia sonhen m hun a ni unu eke kwademe, ifenren e megbu enyi ime ihienni—o ri wuzi unu le enwen unu. ⁵ Ya hain o gi ri m mkpa ni m zi umune enyi ndi hu, ni we bu uzo biau d'e kunrun onu d'a kwademecharin ihien ile gbashari oiyeni hi-ogbe onu kwe nkwa a, m kebe bia; keni o hun uzo wuru oyiye unu wepuha obi unu ye, eleni we waye unu ya olu.

⁶ Ihien rin'a wu hunni: onye hun kunleni oda jenkọ d'a ghorị hun buleni oda; onye hun kun oda jenkọ d'a ghorizikwo hun bu oda. ⁷ Onye-onye ya ye ihien owule ri a obi, y'e meyele e elele; y'e yele nọke si we wa a ye e olu—makeni onye a shiapu efọ e ye ke ihien e a suo Osolobue. ⁸ Osolobue k'a saeka yesonme unu ihien ile ri mma, ye unu ya oda-oda, keni unu hun uzo e nwẹcharin ihien ile ri unu mkpa, hunzi uzo e ye oda ogen owule orun ri mma gi fuha. ⁹ Erira ke Ehuhuo-nsọ don ku e, si,

“O buoyesonme ndi-igbennye ihien
oda-oda;

o k'e mesonme ihien Chuku cho
jenrin ejen.”

¹⁰ Osolobue, hun e ye ihian mkpuru o k'a kunye le ihien-oriri o k'e ri, k'e ye unu mkpuru unu jenko d'a kun; o k'e me e sue, me e mi mkpuru oda-oda; o k'e me onu ghorị mkpuru hun wu ime ihien Chuku cho, ghorị a oda-oda. ¹¹ O k'e me onu wuru ndi-idafin uzọ ile, keni onu hun uzọ a hakenme eka. Enyi nwen k'e me e ru ndi bu oda eka. Eriira ke ihakeni k'a don weheni Osolobue ekele. ¹² Makeni, ihienni unu ri e wepuha obi unu e me siko d'e ye ndi nke Osolobue ihien ri we mkpa; kani ele ohun suo, o k'e mezikwo ndi bu oda e kelesonme Osolobue. ¹³ Unu k'e gi orun-eyemekani weheni Osolobue ogho, makeni o k'a ghosi ndi bu oda, hun k'e ri erere e, ni unu hu a gbaye ozioma Kraisti ahun unu kweri nke-esi, ni ya hain unu gi ye we le ndi ozo oda. ¹⁴ Ihien unu k'a suokenme we; we k'a gha e me ni unu ekpere make efoma Osolobue me ni unu ebe o no me unu sa eka meni we ihienni.

¹⁵ Ekele ya rini Osolobue make oyiye e hun onu ghaleni a saeka a kowa!

Isi Nke Iri

Polu A Kowa Orun A

¹ Mme wu Polu ri a riọ unu; m ri e gi nwayo, e gizi eka-alulu Kraisti, a riọ unu. Mme hun we si ni m'e welu enwen m ali omeni mme le unu nodi elee-m, elee-i, kani m ghahu ebe onu ri pu, a ganma m onu, kushime iken! ² M ri a riọ unu, anikwole n'a wuru ni, m bia, a gwapu m ndi hu ri e ro ni enyi ri e bi ke ndi-ua oku, a hun w'a ni egun ari m enya. ³ Makeni, osuon'a ni enyi bi ime uwa ri ke ihian, enyi ara lu agha ke ndi-ua don a lu. ⁴ Makeni, ihien-ogun enyi ele nke ndi-ua, kama,

ihien-ogun enyi nwonsonme iken Osolobue, hun we gi e tikposonme ebe zeni le ihien ndi hu zeni. Enyi e tikposonme atumiroro-le-ndondo ⁵ le ihien owule hun e bushi enwen e elu, hun e gbondon ihian amarinele Osolobue; enyi a nwundon iroro owule, me e n'o humeni Kraisti isi. ⁶ Enyi a kwademeguo hun enyi e gi gi afunfun son nnupu-isi owule, omeni onu nwen e humechanrin isi uzo ile.

⁷ E leban ni ihien enya ohunma: omeni o wegwo unu enya ohunma-ohunma ni unu wu nke Kraisti, nyanhankwo ni ni ke unu don wu nke Kraisti ke enyi donzi wu nke e. ⁸ Di-nwonna-enyi ye m iken m'e gi du unu: iken m'e gi me unu sue ime okukwe—ele idotu unu. Ya wu, o soso n'a ni m'e gikezi iken ahun a nyan isi, ohun emeko m ifenren. ⁹ Achoni m n'o no ke si m gi ehuhuo-ozim e ron unu egun. ¹⁰ Makeni, o nwe ndi a si, “Ehuhuo-ozim Polu e ze eze, ele we ihien we gi e gu egu; kani, i hun ya le enwen e k'o no, o zeni, o nwondeni ihien we gi oku-onu a e me!” ¹¹ Ndi ri e ku enina we marinkwo ni ihien ohu hu enyi ri e de ebe enyi ri uzo ozo ke enyi jenkwo d'e me enyi bia ebeku.

¹² Enyi esonkokwo ndi ahun ri a ja enwen we mma ma-usue. Makeni, we gha e gi ibe we e lele enwen we, e gi ibe we a ma enwen we, we ri a ghosi ni aghotani we. ¹³ Kani o me nke enyi le enwen enyi, enyi a nyanghafeko isi oken. Ihien ri ogbo Osolobue keye enyi run ime orun izi-ozima soso ke enyi k'e gi nyan isi. Ogbo hu rude ebe unu ri. ¹⁴ Ya wu ni enyi arunghafeni ogbo enyi ogen enyi gi weheni unu ozima—hun o me ni enyi wu ndi ibuzo bia ebeku teni unu ri d'e zi unu ya wu ozima Kraisti. ¹⁵ Enyi ari a nyanghafa isi oken—ya wu

ęnyi ara gi ọrụn ndi ọzọ rụn a nyan isi. Olil'ęnya ęnyi wu ni okukwe unu k'a gha e suewaye, keni ęnyi hun ọzọ e nwonwaye oghere ęnyi e gi rụn ọrụn ime igunrun unu; ¹⁶ ęnyi a hun ọzọ gha ali unu si ali ndi ọzọ d'e zi ozioma. Ogen hu, oku igi ọrụn ndi ọzọ a nyan isi arikozi.

¹⁷ Ehuhuo-nsọ si,

“Onye k'a nyan isi

ya gi ihięn Di-nwonni-ęnyi me nyan isi.”

¹⁸ Makeni, ele onye hun a ja enwen e mma ke we e ku oku e ohunma, kani onye hun Osolobue ja mma.

Isi Nke Mmanai

Polu Le Ndi-ozu pu-ichen Ntu

¹ K'o ri m unu e din m ni m zuzu ekerę. Dodo ni, nwon ni ni m ndidi! ² ęnya ri a fu m make onodi unu, udi ęnya-ufu hun gha eka Osolobue bia. Unu wu nwa-agbo m kwe okenye ohu suo nkwa ni m jenkọ d'a luye e ya. Okenye ahun wu Kraisti. M kwe nkwa ni m jenkọ d'e we onu ye e ebe onu keleni marin okenye. ³ Kani, egun ri a tu m ni we jenkọ d'e dufie onu, nọke ke Ekwensu don gi ero dufie Ivu, me unu e fezile Kraisti ofufe ezioku le hun rulen: ⁴ makeni unu a nabanhankazi onye owule bia d'e zime unu ozi Jesu ọzọ hun wulen hun ęnyi zi unu ozi e; ara fu unu ọrụn inabanhan mmon ọzọ mobu ozioma ọzọ hun wulen hun unu gha eka ęnyi nwehen. ⁵ Kani, o weni m ęnya n'o nwegho ke ndini unu a kpo “oken ndi-ozu pu-ichen” don ka m. ⁶ Ikenkwọ a ma m ku oku; kani, a maringho

m ihien—enyi e gigoọ ụzọ ile ghoị ụnu ọnwani ime ọnođi ile.

⁷ M me njo m gi welua enwen m ali zi unu ozioma Osolobue ofe, keni Osolobue gi e busi unu elu? ⁸ Ogen m gi ri a runni unu orun, uka ndi-ozo ye m ihien, a narin m we bu ele we ke m gi e a runni, o no ke si m ri e zunarin we ihien we—keni m hun uzọ runni unu. ⁹ Ke m ri ime igunrun unu, ogen ihien gi ri a fu m orun, ebuyeni m onye owule ibu, makeni umune enyi gha Masedonia bia weheni m ihien ile ri m mkpa. Ya wu, mme si n'a wuko m ibu ebe unu ri. Eriira k'o jenko d'a risonme: awuko ni m unu ibu. Kaka! ¹⁰ Makeni ezioku Kraisti ri ime m, m ri e ku e n'o nwonni ihien jenko d'a saeka napu m ihienni m gi a nyan isi ime Azuun Akaya ile! ¹¹ Ki hain nwan? Makeni enwe m ihien-osusuo unu? Mba. Osolobue a maringho ni m nwe ihien-osusuo unu!

¹² M jenko d'e mesonme ihienni m ri e me, amangbe ndi hu ri a nyan isi ni we wu ndi-ozu pu-ichen a hun oghere hu we choko hun ihian e gi si ni enyi le we wu ohu. ¹³ Ndinu ele ndi-ozu pu-ichen nke-esi; ndi-ndufie ke we wu. We ri a za ndi-ozu pu-ichen Kraisti e gi e e kpume ihun. ¹⁴ Onwan ele ihien a tu enya! Makeni, ke Ekwensu le enwen e e mede ke si o wu mmon-ozu ukpe! ¹⁵ Ya wu ni ele ihien a tu enya omeni ndi-orun a hu e me ke si we wu ndi a run ihien ri mma. We jenko d'a narin ugwo-orun furu ihien we ri e me.

Afunfun Polu Ta Makeni O Wu Onye-ozu Pu-ichen

¹⁶ Ni m kuzi e, erokwole ni ni m wu onye-nzuzu! Kani, omeni iya ke unu ri e ro, weri ni m nwan rike onye-nzuzu, keni m hun uzọ nyan isi ekerere.

17 Ełe Di-nwõnni-ęnyi sị m ku ihienni m cho ni m gi nyan isi—kani, m ri e kuhu rike onye-nzuzu. 18 Ebe o me ni ndi bu oda hu e gi ihien ihian-mmaka a nyan isi, mme nwen jenko d'e mezikwo erira. 19 Unu le enwen unu a marinka ihien! Iye ndi-nzuzu efe, a nabanhan we, a suoka unu. 20 Unu a nabanhanka onye owule hun e me unu ke igbon, mobu hun e rigbu unu mobu hun a tunarin unu ihien onu mobu hun e me ke si o rika mkpa mobu hun a made unu ora! 21 Osuon'a ni ifenren m ro, ni m ku e: obi ęnyi ezeruni erira.

Kani, ihien owule we nwe egun ni we gi nyan isi, egun k'a nizikwo m gi ihien ahun nyan isi; (m ri e ku ke onye nzuzu.) 22 We wu ndi Hibu? Ya ke mme nwen wuzi. We wu ndi Izrelu? Ya ke mme nwen wuzi. We wu umu Ebrahim? Ya ke mme nwen wuzi. 23 We wu ndi-orun Kraisti? M ri e ku rike onye isi zuleni oke: mme ka we onye-orun Kraisti a wu, mme ka orun a run, mme ka ngan e jen, mme ke we ka mkpinsin a fian—mgbe ole-le-ole ke we fianpu m mkpinsin. Onwun a kposonmezi m ihun. 24 Mgbe isen ke ndi Ju fianpu m ube-mkpinsin ohu-aria-ogunnai we ahun.

25 Mgbe eto ke ndi Rom fianfu m mkpinsin. A maguwo we m omuma mgbe ohu. Mgbe eto ke ugbo-mirin m ri ime e tikpopu. A nogho m elu mirin uhuhin ohu gbe-gbe-gbe—uhinhin le efinnai, ibe osisi suo ke m hun kwondon eka elu mirin ahun. 26 M'a risonme uzo-ijen; eje-ihien a kposonme m ihun elu-iyi; ohin a kposonme m ihun; eje-ihien ndi ali m k'e me m a kposonme m ihun; eje-ihien ndi ali ndi ozo k'e me m a kposonme m ihun; eje-ihien a kposonme m ihun ime obodo—ihian jun, a

kposonmezi m ihun ime atụ—ihian rileni; eje-ihien a kposonme m ihun elu-ohimin; nsongbu ndi kpo enwen we ndi kwerini bu ekwerini we a kposonme m ihun. ²⁷ M'a rungbu enwen m; m'a ta afunfun; m'e chusonme-uran; m'e busonme egun ihien-oriri le ihien-orira; ihien-oriri a kosonme m; m'a risonme onodi oyi gi a tu m; ekwa a kosonme m. ²⁸ Wezukade ihien ndi ozo ile, uhuhin ile ke m gi e bu ibu iroro orinimma uka ile. ²⁹ Onye ke ndun guu, hun ndun ogugu a guleni mme nwen ndun? Onye ke we me dan ime okukwe, o noleni fukemem?

³⁰ Omeni m k'a nyanriri isi, ihien ndi hun a ghosi ni ndun ari m ke m'e gi nyan isi. ³¹ Osolobue a maringho ni ele m ri a tu ntu—Osolobue, hun wu Osolobue le Nedi Di-nwonna-enyi wu Jesu—ojjamma ya rin'a jerrin ejen! ³² Ime obodo Damas'kosi, Govanọ ki okpuru eze Aretasi buto ndi-nche onumgbon obodo hu, keni o nwundon m, ³³ kani we no gi ukpali gha oghere ri mgbon hu wetu m, m no wanahin a.

Isi Nke Mmẹbụọ

Ihien Osolobue Ghosionme Polu

¹ O ri mkpa ni m nyansonme isini—osun'a ni o nweni erere o ban. Ni m ku nwan oku ohun le ihien ndi hun Di-nwonna-enyi ghosi m.

² A maringho m onye nke Kraisti ohu, hun we weri shi elu-igwee nke eto ahua mmenọ ghanị—ke ime-ehu k'o me k'o gha ime ehụ pu, a marin m; Osolobue ya marin. ³ A maringhozi m ni we weri onyeni—amarin m k'o ri ime ehụ ra o gha ime ehụ pu, Osolobue ya marin— ⁴ w'e shi ali Izu-iken wu

Paradaisi, ọ nọ nụ ihien ndi we ghaleni a gwa ihian, ihien ndi we ghaleni a ni ihian e ku.

⁵ M k'e gi nwan onye nọ enina nyan isi, egiko m mme le enwen m nyan isi; ihien ndi hun a ghosi ni ndun ari m suo ke m'e gi nyan isi. ⁶ Kani, o mede ni m cho ni m nyan isi, ele ya wu ni m wu onye-nzuzu, makeni ihien m k'e ku wu ezioku. Kani, emeko m'a, make ihian gha e ro ni m wu ihien owule kari ihien we hun m me le hun we nu m ku— ⁷ makeni ihien ndini m hun a puka ichen. Kani, igi gbondon m amangbe m'e gi ifiri ihien ndini pu-ichen m hun pacheme, Osolobue nọ bu nsongbu che m ehụ— rike ebe we nọ kpọ ogun ye ihian ehụ. Nsongbuni wu onye-ozu Ekwensu. We we e che m ehụ n'ọ hun ụzọ a lu m, amangbe m'a pacheme. ⁸ Mgbe eto ke m riọ Di-nwonn-enyi banyeni ihienni, n'ọ me e hapu m. ⁹ Kani Di-nwonn-enyi nọ si m, “Mba; eyemeka m e higuọ i, makeni ebe ndun noleni ri ihian ke iken m nọ a puhacharin ifon.” Ya wu, m gi nwan ighoghọ a nyan isi ni ndun ari m, keni iken Kraisti hun ụzọ risonme ime m. ¹⁰ Ya wu, make ufiri Kraisti, ọ hughọ m mma ni ndun ari m; ni w'a kpari m, ni m'a ta afunfun, ni we e kpokpo m le ni odakin ri ichen-ichen a biani m. Makeni, ogen owule ndun gileni ri m ya ke m gi e kenren.

Orinimma Ndi Kọrẹnti Ri Pọlu Obi

¹¹ E meguo m ke onye-nzuzu! Unu hain m gi me e! Unu te furu hun e kuni m ohunma—makeni o nwonn ke ndini unu ri a kpọ oken ndi-ozu pu-ichen don ka m mkpa a ri, osuon'a ni o nwonn ihien m wu.

12 Oge m gi ri ime igunrun ọnu, m tu-udon runchanrin ihien bu oda we gi a marin ezigbo onye-ozu pu-ichen: ke ihien-ahima ke ihien a tu enya ke ihien a ghoji iken Osolobue. 13 Ki we me ni uka ndi-ozo hun we meleni ni onu, wezuka ni ebuyeni m unu ibu iye m ihien m'e gi bi? Dodo ni, gbaghari ni m njo m me hun m gileni buye unu ibuni!

14 Lee n'e, a kwademeguọ m nwan ni m lala d'a hun unu nke mgbe eto. M bia, anakọ m unu ihien owule, emeko m ibu. Makeni, unu ke m cho, ele ihien unu. Eghęe, makeni ele unu a kpatoni ndi mu ni we ihien, ndi munu we nwe a kpatoni we. 15 O k'a suogbude m igi ihien ile m nwon yeni unu aka—gizide ndun m. O me nwan ni m ri a nwe waye ihien-osusuo unu, unu k'e belua nwan ihien-osusuo unu nwe ebe m ri?

16 Unu nwe iken si, "Osun'a ni ezie ro ni y'e buyeni enyi ibu, y'e megho enyi ero, dufie enyi, teri enyi." 17 Nani ke m don me e? M gide nwan ndi m ziheni unu tunarin onu ihien onu ra? 18 Mme riọ Taiotosi n'ọ bia d'a hun unu; m no zizikwo nwene-enyi hun-ebọ hu chen'e. Taiotosi a tunarinni unu ihien unu. Ra o tunarinde unu atunarin? Ele agungun ohu hu ke enyi gun? Ele usonron ohu ke enyi gi run?

19 Unu rida e ro ni enyi gi ihienni ile enyi ri e ku e kinrin onu enyi ebe unu ri ra? Mba. Enyi ri e ku nọke ndi ri ime Kraisti; enyi ri e ku rike ndi ri id'enya Osolobue. Ndi ri m obi, enyi ri e me ihien ile enyi ri e me ni enyi gi e yeni unu aka sue ime okukwe.

20 Egun ri a tu m ni ikenkwo, m bia, ahunko m unu ke m don cho, unu nwen ahunko m ke unu don

chọ; egun ri a tu m ni, ikenkwọ, ikpe le ęnya-ufu le eje-olulu jęnkọ d'a ri; ni ndi hu ime unu k'a chọma nke-wę, nke-wę; ni nkuto, oku-azuun, mpache le isusu jęnkọ d'a ri. ²¹ Egun ri a tu m, ni, ikenkwọ Osolobue m e welua m ali ebe unu ri—ogęn m'e gi biazị, ikenkwọ a kwanma m ękwan make ndi bu oda me njọ mbu, hun keleni gbehuto obi we banyeni ihien ndi hu ru unyin we me le ughere le ihien-ifenren ile we mesonme.

Isi Nke Mmęto

Mkpinsin-ęka Le Ekele Ikpazuun

¹ Onwan k'e me e mgbe eto m lala d'a hun unu: “Osheri madu ębuo mọbu eto ke we siko d'e gi gi ikpe owule don.” ² A gbaguọ m ndi hu me njọ mbu le ndi ozọ hodunị mkpinsi-ęka—ke m bia hun me e mgbe ębuo; m rizi nwan a gba we ya hunni m rileni ebęhu, ni, m bia, egiko m ęka alulua son onye owule — ³ ebe o me ni unu chọ ni m ghosi onu ni Kraisti ri ime m e ku nke-esi. Kraisti a ra gi ęka-alulua e son onu—mba! O gi iken e me ihien ime onu. ⁴ Osuon'a ni we kpogbu e elu-obe nọke onye nwonleni iken, o huzi nwan ndun ghahani iken Osolobue. Ime e, ęnyi nwen nke rizikwo ke ndi nwonleni iken; kani, o me nke ęka ęnyi k'e gi son unu, ęnyi k'e son e gi iken Osolobue bi, gi iken Osolobue hu son unu.

⁵ Lekpo ni enwen unu, ni unu marin ke unu hu ime okukwe. Lele ni enwen unu. Unu amarin ni Jizos' Kraisti ri ime unu? Unu a maringho nu—sunkpan ni unu a danguo nlele hu.

⁶ M nwon olil'ęnya ni unu k'a hun a ni ęnyi nwen adanni nlele hu. ⁷ Kani, ęnyi hu e me ekpere a rio

Osolobue, amamgbe unu e me ihien owule rileni mma—ele keni we si ni enyi puha ohunma, ni enyi a runka orun ime igunrun unu, kama, keni onu mehu ihien ri mma—osun'a ni enyi no ke ndi dan nlele hu. ⁸ Make ni, enyi a saeka me ihien owule e gbondon ezioku, kama, ihien a kwadon ezioku suo ke enyi e me.

⁹ Enyi a ghoghohoho omeni enyi ezeni bu onu e zegho. Ekpere enyi wu ni unu zuchanrin oke. ¹⁰ Ya hai m gi deni unu ihien ndini ogenni m keleni bia ebahun unu ri, amamgbe m'a bia, e gi m iken hu Di-nwonna-enyi ye m gi du unu gi aka-iken son unu—iken hun o ye m gi me unu sue, ele hun m'e gi tikpo unu.

¹¹ Nke ikpazuun, umune m, ghoghoma ni; [nodi ni ohunma!] Bihuto ni aka; a gba ni ibe unu umen; e nwon ni obi ohu; e gi ni udon e bi. Unu me enina, Osolobue hun udon le ihien-osusuo gha aka a bia k'a noyeni onu.

¹² Dide ni ibe onu odide ri nsu. Ndi nke Osolobue ile e zi ekele unu.

¹³ Efo ma Di-nwonna-enyi wu Jesu Kristi le ihien-osusuo Osolobue le mmeko ri ime Mmon-nsu ya noyeni onu ile.

**Elu Ọhụn: Ekwọ-Nsọ (Azụn Ọhụn rịn'a)
Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

xxx

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files dated 29 Jan 2022

31b0248e-272a-5dee-8226-bcc00c54d9b1